

1 TIMOTI

Pepa Paulo ingere munğa pa Timoti

Timoti nde tamâta limoa tonĝe munğa iyoka kuku Paulo itula pâri ara panzi tamâta lâ lawea pinde (Pâri Tamâta 16:1-5). Ĩineŋga ilâ imo Efesus lawea ikai poe panzi kalo-tawana tamâta ŋgu simo ŋinde, aku itula Maro Kindeni kawa ŋgua panzi. Paulo ku Timoti rua simo nambwe nambwe sondo, kala Paulo ingere ŋgua ŋine ŋana ipu tini kaika papa wa ipanana i ŋana ikatonanzi ŋgu wa. Ipai Timoti tu ma ipakatona sondo ŋananzi pananâŋa tamâta laŋeŋa, aku itula ŋgua papa ŋana tamâta mana ikura tu imo katonâŋa panzi Maro Kindeni ne ŋgu.

1 ¹Naŋa Paulo, Yesu Kirisi ne pâri-tamâta naŋa. Nenda Yautâŋa Tamwata Maro Kindeni, aŋga Yesu Kirisi, ina tamâta ŋinde kindu uru tao tininda papa, kinzi rua munğa sipatea naŋa, kala apâŋga amo pâri-tamâta. ²Naŋa aŋgere ŋgua lâ pepa ŋine tini imâ pa noko Timoti. Kinda rua kalonda tawana Yesu, aku ŋana nenda kalo-tawana ŋine kâ, ande noko kumo kutogo naŋa natuŋgu mao. Tamânda Maro Kindeni ŋga nenda Maro Ĩalae Yesu Kirisi rua nenzi wisi-wisi wa kalo-sukâŋa wa wisi-pisi wa imo kuno.

Ara ŋana kindu ma talelea ŋgua laŋeŋa rârâni

³Ĩine naŋa atu aporo ŋgua kaŋa taituni pa noko kilo, itogo aporo pano munğa, lâ zo ŋinde naŋa alâ pa Masedonia tâno. Naŋa ilonĝu tu noko ma kumo ndainani nâ lâ Efesus lawea, aku kutula ŋgua kaika panzi tamâta pinde ŋana sipile nenzi mâsi ŋana siporo ŋgua laŋeŋa kâ, lâ zo ŋana sipanananzi tamâta ŋana Maro Kindeni ne ŋgua kâ. ⁴Aku kuporo ŋgua kaika panzi tu ma sipile nenzi mâsi ŋana sitapâri timbunzi nenzi usi kaa nâ, aku sipile nenzi mâsi ŋana siveta ŋgua kie-kie rârâ siporo ŋana timbunzi ŋanzi kâ. Ĩgua kaŋa mine uru iveta ŋgua nâna ipâŋga, aku ŋinde ikura ŋana isuka nenda kalo-tawana ŋana tasama Maro Kindeni ne ilo-kalo ara kâ, ande tia. ⁵Ambo tamâta ŋinde ma sipile nenzi mâsi

potomule ñinde, ande nenzi kalo-tawana ma keno mao pa Yesu Kirisi, aku ma simo ilonzi mbâra-mbâra lâ Maro Kindeni nao, aku ma sipasama tu nenzi soki tonje keno tia. Ñineŋga kinzi ma sio nenzi tini-mwasa ilâ panzi kalo-tawana tamâta. ⁶Tamâta pinde sipile kalo-tawana mao ne vetâŋa ara ñinde, kala ñine kinzi siporo ŋgua kaa kaa mine. ⁷Kinzi ilonzi tu sipanananzi tamâta pinde ñana Maro Kindeni ne ŋgua tukuŋa kâ, aku ilonzi keno tu nenzi ŋgua ndoni nde mao nâ. Kinzi uru situla ŋgua kaika, andeta warakanzi sizizâla ñana nenzi ŋgua ñinde ne duvi.

⁸Kinda tasama tu Mose ne ŋgua tukuŋa nde ara ndo. Taitu kinda ma kalonda ñgere sondo ñana tukuŋa ñinde ne duvi kâ. ⁹Kinda tasama tu ŋgua tukuŋa ne wurâta ñandai ñana itula nzâla panzi tamâta arara ŋga. Ñgua tukuŋa ne wurâta nde ñana itula nzâla panzi tamâta ñinde uru sipu ŋgua tukuŋa ututu ku siveta taŋa-kaika ne vetâŋa. Kinzi sipu mulinzi pa Maro Kindeni ku siveta vetâŋa potomule nâ. Kinzi simege ñana Maro Kindeni ku siveta mâsi ara pinde, ande tia. Kinzi uru siveta mâsi sakamao pinde mine: kinzi sipunzi tinanzi tamanzi pâta simâte, aku sipunzi tamâta pinde pâta simâte tona; ¹⁰kinzi tamâne sipalulua tininzi ilâ potomule panzi taine pinde, aku sipalulua warakanzi tininzi mine nâ kunzi nawalanzi tamâne tona; kinzi sipanawenzi tamâta pinde ku sivetanzi sikai wurâta kaa nâ; aku siporo ŋgua laŋeŋa wa siveta ŋgua pâŋa kaa nâ wa. Mao nâ, ŋgua tukuŋa ne wurâta nde ñana itula nzâla panzi tamâta ea uru siveta mâsi potomule ndia ñandai ipakura kuku ilo-kalo ara. ¹¹Andeta Maro Kindeni ne ilo-kalo ara ikeno pâri ara tini, pâri ara ñinde i muŋga itula pa naŋa kala uru aporo atula pwataki. Pâri ara ñinde itula Maro Kindeni kilala pwataki tu i nde Ara Tamwata, aku nenda paneŋa ilâ pa i nâ.

Paulo kawa ndaŋge pa Maro Kindeni, ñana tu i kalo sukâŋa ñana i kâ

¹²Muŋga, nenda Maro Yesu Kirisi imora naŋa tu naŋa akura ñana aveta wurâta papa i kâ. Mine kala i ne walo ilua naŋa lâ ñana atula i kawa ŋgua kâ. Ipateana ñana aveta i ne wurâta ñine kâ. Mine kala naŋa kawâŋgu ndaŋge papa i. ¹³Mao nâ, muŋga naŋa aporo ŋgua pavaligiŋa papa i, aku aveta keŋgu sakamao panzi i ne tamâta apunzi tona. Andeta isama tu naŋa azizâla ñana i kâ, aku ñandai kalonju tawana i ŋga, kala aveta vetâŋa ñinde. Mine kala i kalo sukâŋa ñanana. ¹⁴Aku nenda Maro Ñjalae ne wisi-wisi ñalae nde imâ ndo pa naŋa lâ, aku igagati ilonju kalonju ñana ao nanenju kalo-tawana ilâ papa i nâ. Aku i ne wisi-wisi ñinde igagatina ñana tiniŋgu mwasa panzi kalo-tawana tamâta tona. Kalo-tawana wa tini-mwasa kie mine uru ikeno pa kinda tamâta râŋani ñine tapaipa kuku Yesu Kirisi.

¹⁵Yesu Kirisi indue imâ tâno kulu ñana iyautenzi kiesaka tamwatanzi piti lâ kondoma ilo. Ñgua ñinde nde mao kanaŋo, aku ara ñana tamâta

rârâni ma siloŋo ku kalonzi tawana. Aku naŋa warakâŋgu muŋga aveta kiesaka ŋalae ndo, kala amo atogo kiesaka tamwatâŋgu mine, apolenzi tamâta rârâni ŋana aveta kiesaka kâ. ¹⁶Mao nâ, naŋa apolenzi tamâta rârâni ŋana aveta kiesaka kâ. Andeta Maro Kindeni kalo sukâŋa ŋanana, ŋana tu itu itula pwataki panzi tamâta ma sipâŋga muli-muli ŋinde tu Yesu Kirisi nao mwasa ndo panzi kiesaka tamwatanzi. Aku tamâta ma sipâŋga muli-muli ŋinde ma simora Yesu ne vetâŋa ŋinde, kala ma kalonzi tawana i, ku ma sikai via ŋana simo ara mine ku simo nâ. ¹⁷I imo Koipu ŋalae ikura zo zo ku imo nâ. I ma nao tia, ande tia ndo. Aku kinda tâno tamâta takura tu matânda tamora i kâ, ande tia. Maro Kindeni simbo nâ nde Maro Mao. Mine kala zo rârâni kinda ma tapanea i tasuka ŋa kâki. Mao.

**Paulo itu ŋgua pa Timoti tu ma ipara kaika
ŋana ipu vetâŋa sakamao ndue**

¹⁸Timoti, naŋa natuŋgu noko, naŋa ao nanenŋu ŋgua ŋine imâ pano. Kinzi ŋgua-tulâŋa tamâta pinde muŋga situla ŋgua pwataki ŋana noko kâ, aku nanenŋu ŋgua ŋine nde iyoke nenzi ŋgua ŋinde. Ambo noko ma kalo ŋgere ŋana ŋgua ŋinde kâ, ande ŋinde ma ipu tini kaika pano lâ zo ndia noko kupara kaika ŋana kupu vetâŋa sakamao ndue kâ. ¹⁹Ara ŋana noko ma kalo tawana Yesu kaika lâ paraŋa ŋinde ilo, aku kupasama sondo lâ tamwata ilo kalo tu noko ne soki tonŋe tia lâ Maro Kindeni nao. Maro Kindeni uru itu ŋgua kaika lâ tamâta ilonzi tu ma sipile nenzi vetâŋa soki, andeta kinzi pinde tininzi pwâka tu sipile nenzi vetâŋa ŋinde. Mine kala nenzi kalo-tawana nde imbe ndo lâ, itogo wâŋga ikâki pitiku kulu ku ipwa pwataki mine. ²⁰Tamâta rua, Himeneus ku Arisande rua, muŋga siveta mine, kala naŋa aonzi rua silâ pa Sadana mbau ilo, ŋana ma kalonzi ŋgere sondo ku sipile nenzi mâsi ŋana siporo ŋgua pavaligiŋa pa Maro Kindeni kâ.

**Ara ŋana kinda ma tano pa Maro Kindeni tu
iveta kie ara panzi tamâta rârâni**

2 ¹Naŋa ilonŋu tu noko ma kuveta vetâŋa ŋine muŋga lâ ŋga; kupanananzi kalo-tawana tamâta tu ma kawanzi ndaŋge pa Maro Kindeni ŋana tininzi pinde rârâni, ku sino kaika pa i tu ma iveta kie ara panzi.

²Ara ŋana kinda ma takai noŋa kaika pa i tu ma iveta kie ara panzi koipu ŋalajala wa kinzi tamâta mbâna-mbâna wa. Ambo i ma iveta mine, ande kinda rârâni ma tamo ara, aku ma tamo tava wisinda pisi nâ. ŋineŋga kinda ma taponu muli pa vetâŋa ara rârâni Maro Kindeni ilo papa ŋinde, aku ma taveta vetâŋa ara nâ lâ i nao. ³Noŋa kie mine nde ara ndo lâ nenda Yautâŋa Tamwata Maro Kindeni nao. Mao nâ, i tini mwasa

ndo ɲana noɲa kie mine. ⁴I ilo tu iyautenzi tamâta rârâni piti lâ kondoma ilo, aku i ilo tu kinzi ma sisama ɲgua mao duvi tona. ⁵Kinda tasama tu Maro Kindeni simbo nâ nde Maro mao. Aku tasama tu tamâta taitu nâ imandi kinda tamâta ɲga Maro Kindeni ɲgininda ɲana ilulu Maro Kindeni ne wisi-nâna kâ, aku tamâta ɲinde nde Yesu Kirisi tamwata. ⁶Maro Kindeni muɲga ipatea zo pa Yesu Kirisi, aku lâ zoni ndaina nâ, ande Yesu ipile tamwata ne via ku imâte ɲana ikonzi tamâta rârâni piti lâ kondoma ilo. Aku vetâɲa ɲinde itula Maro Kindeni kilala pwataki pa kinda. ⁷Maro Kindeni ipatea naɲa tu amo i ne pâri-tamâta, aku wurâta ilana ɲana atula i kawa ɲgua ɲinde pwataki. Naɲa aporo mao, alâɲe tia. I wurâta ilua naɲa ɲana apanananzi tamâta lâ tinikoa ɲgu, ɲana nenzi kalo-tawana ma ilâ mao pa Yesu Kirisi.

⁸Mine kala naɲa ilonɲu tu kinzi tamâne simo nia ndoni ma sisuka mbaunzi kâki ku sikai noɲa. Naɲa ilonɲu tu kinzi ma sio ilonzi ndo ilâ pa Maro Kindeni, aku ma sipile mâsi ɲana wisinzi nâna wa sipambita wa.

Mâsi ɲana siveta vetâɲa ara kâ ande itogo taine nenzi siɲgâra mao

⁹Aku naɲa ilonɲu tu kinzi taine ma sisawa pasawaɲa wa sipita lalava sondo, ɲana itula pwataki tu kinzi sipatawa warakanzi tininzi. Naɲa tiniɲgu pwâka tu kinzi ma sipalaki kulunzi ku sisinga kulunzi pwau ɲga tininzi lâ kekelele kulu ɲalae koɲa, itogo mbote-mbote arara wa mira “gol” wa. ¹⁰Ambo taine ilonzi tu sipono muli pa Maro Kindeni ku sipanea i, ande ara ɲana kinzi ma siveta vetâɲa ara nâ panzi tamâta. Aku nenzi vetâɲa arara ɲinde ma keno itogo nenzi siɲgâra ara mwasina.

¹¹Naɲa ilonɲu tu kinzi taine ma sipatawa warakanzi tininzi ku sisae kawanzi, aku sipanâna nâ ɲana Maro Kindeni ne ɲgua kâ. ¹²Naɲa uru asâu panzi taine ɲana sikai poe panzi tamâne ku sipanananzi ɲana Maro Kindeni ne ɲgua kâ, ande tia. Ara ɲana kinzi taine ma kawanzi buu ku sipalono pa ɲgua nâ. ¹³ɲana tu Maro Kindeni iveta tamâne Adam muɲga lâ, ɲineɲga iveta taine Eva muli. ¹⁴Aku Adam ɲandai kalo tawana ɲgua laɲeɲa ɲga. Taine nâ kalo tawana ɲgua laɲeɲa kala iveta kiesaka. ¹⁵Andeta Maro Kindeni ne pateâɲa ikeno mine tu kinzi taine nâ ma sipaguguanzi lâlu. Ambo nenzi kalo-tawana ilâ pa Yesu Kirisi ikura zo zo, ku siveta vetâɲa soki tonɲe tia lâ Maro Kindeni nao, ku tininzi mwasa nâ panzi tamâta, ande Maro Kindeni ma iyautenzi piti lâ kondoma ilo.

ɲgua ilâ panzi tamâta mbâna-mbâna uru sikai poe panzi katonâɲa

Titi 1:5-9

3 ¹ɲgua ɲine nde mao kanaɲo: ambo tamâta tonɲe ilo tu ikai poe panzi ɲgu nenzi katonâɲa, ande wurâta itu iveta ɲinde nde wurâta ara ndo. ²Ambo taitu nanenɲu ɲgua pinde ilâ pa tamâta ea itu imo mbwananâɲa panzi katonâɲa kâ. ɲgua ɲinde nde mine: i ma iveta vetâɲa soki tonɲe tia;

i ma ikai kaiwa taine taitu nâ; i ma ipakatona tamwata sondo ŋana kiesaka kâ; i ma ikai poe sondo pa tamwata ne ilo-kalo; aku i ne vetâŋa rârâni nde ma ara nâ. I ma ikainzi tamâta lombo ku ikatonanzi simo sondo lâ i ne luma ilo; aku i ma isama pâta ŋana ipanananzi tamâta ŋana Maro Kindeni kawa ŋgua kâ. ³I ma imo tamâta ŋana inu lââ kaika ku idauda, ande tia; i ma wisi nâna walele ku ipara kunzi tamâta tia; i ma nao mwasa nâ panzi tamâta; aku i ma ilo ŋalae koŋa ŋana igona mbaliŋa kâ, ande tia. ⁴I ma ikatonanzi i tamwata kaiwa-natu sondo, ku ma ipanananzi natu sondo ŋana siloŋo i ne ŋgua ku simege ŋana i kâ. ⁵(Ambo tamâta tonje ikura tu ikatonanzi i kaiwa-natu sondo tia, ande i ma ikura ŋana ikatonanzi Maro Kindeni ne ŋgu, ande ma tia.) ⁶Kalo-tawana tamâta wasaseki tonje ikura ŋana ikai poe panzi katonâŋa kâ, ande tia. Tia ma i ilo tu i nde tamâta arando, aku ma ipasuka tamwata tini. Aku ŋana ŋinde kâ, Maro Kindeni ma io i lâ ŋgua nia, itogo muŋga io Sadana lâ ŋgua nia mine. ⁷Aku katonâŋa nenzi poe tamâta ma imo tamâta mine: kinzi tamâta simo niaka ŋana Maro Kindeni ne ŋgu kâ, ande ma uru siporo ŋgua ara nâ ŋana poe tamâta ŋinde kâ. Ŋana tu ambo i ma ipakatona tamwata ne vetâŋa tia, ande kinzi ma siporo ŋgua sakamao ŋana i kâ, aku Sadana ne nimbu ma ikai i kaika lâ.

Ŋgua ilâ panzi ŋgu nenzi katonâŋa

⁸Aku mine nâ, nanenŋu ŋgua pinde ilâ panzi ŋgu nenzi katonâŋa tona. Ŋgua ŋinde nde mine: kinzi ma sipakatona warakanzi sondo ŋana nenzi vetâŋa kâ; kinzi ma simo togo memelanzi rua tia; kinzi ma sinu lââ kaika ku sidauda tia; aku kinzi ma ilonzi ŋana sitapa tamâta pinde nenzi mbaliŋa saŋenzi, ande tia. ⁹Kinzi ma kalonzi tawana ŋgua mao rârâni Maro Kindeni muŋga itula pwataki ŋinde, aku ma sipasama lâ warakanzi ilonzi kalonzi tu nenzi soki tonje tia lâ Maro Kindeni nao. ¹⁰Miki ma kakai samâŋa panzi ŋana nenzi vetâŋa kâ muŋga lâ ŋga. Ambo siveta wurâta sondo, ande ma sikura ŋana sikai katonâŋa panzi kalo-tawana tamâta.

¹¹Aku ŋgua pinde kala ilâ panzi taine nenzi katonâŋa mine nâ. Kinzi ma sipakatona warakanzi ŋana nenzi vetâŋa uru siveta ŋinde kâ; kinzi ma siporo situ tamâta ŋguananzi tia; kinzi ma sipakatona warakanzi sondo ŋana kiesaka kâ, ku ma siveta nenzi wurâta rârâni sondo ndo.

¹²Ŋgu nenzi katonâŋa nde ma imo tamâta mine: ikai kaiwa taine taitu nâ, aku uru ikatonanzi i tamwata kaiwa-natu sondo. ¹³Ambo ŋgu nenzi katonâŋa ma siveta nenzi wurâta ara, ande tamâta ma siporo ŋgua ŋananzi mine tu, “Kinzi nde tamâta ara”. Ŋinenŋa katonâŋa ŋinde ma siruru tia ŋana situla nenzi kalo-tawana pwataki tu kinzi kalonzi tawana Yesu Kirisi.

Ŋgua ŋalae ŋana Yesu Kirisi kâ

¹⁴Timoti, naŋa ilonŋu tu amâ walele amorano, andeta ara ŋana angere ŋgua pinde pano lâ pepa tini tona. ¹⁵Mine kala, ambo naŋa akura tu

amâ walele tia, ande noko ma kusama sondo ɲana vetâɲa arara Maro Kindeni ilo tu i ne tamâta ma siveta ɲinde. Kinda tamo Maro Kindeni Via Tamwata ne tamâta, tatogo i natu wukale mine, aku kinda ɲgu ɲine uru takatona i ne ɲgua mao ku tatula pwataki. ¹⁶Kinda tasama tu ɲgua mao Maro Kindeni itula pwataki ɲinde nde ɲgua ɲalae tina. ɲgua ɲinde nde mine: “Kirisi indue imâ ipâɲga tâno kulu itogo tamâta mine, aku i ne mandija lâ mateja nianzi itula pwataki tu i nde Maro ɲalae. Kinzi aɲelo rârâni nde simora i kilala pwataki, aɲga ne kalo-tawana tamâta nde silâ situla i parina panzi tamâta ɲgu ndoni, aɲga tamâta rârâ pa tâno ndoni nde kalonzi tawana i. Maro Kindeni ikai i kâki lâ samba ilo, aku imo ikai Maro ɲalae.”

ɲgua laɲeja kie-kie uru izavaru tamâta ilonzi kalonzi

4 ¹Koroani Sapâɲa itula ɲgua pwataki tu lâ zo muli ɲana tâno ne zo marumbu kâ, ande tamâta pinde ma sipile nenzi kalo-tawana. Kinzi ma sipalogo pa ɲgua ɲinde koroani laɲeja sipanananzi tamâta, ku ma sipono muli pa koroani saka nenzi ɲgua ɲinde. ²Laɲeja tamwatanzi pinde ma situla ɲgua laɲeja panzi kalo-tawana tamâta. Tamâta ɲinde sipayaula warakanzi ilonzi kalonzi marumbu lâ, kala sizizâla tu nenzi vetâɲa nde kiesaka. ³Laɲeja tamwatanzi ɲinde ma situ kaika panzi tamâta tu ma sipakâe kaiwanzi tia, aku ma situ kaika panzi tu ma sika kâpwa pinde tia tona. Andeta Maro Kindeni iveta kâpwa rârâni ɲinde pa kinda tu taka. Kinda kalonda tawana i, aku tapanâna lâ ɲana ɲgua mao kâ. Mine kala kinda takura ɲana takai kâpwa ɲinde, aku taka tava kawânda ndaɲge papa i. ⁴Kinda tasama tu kelekele rârâni Maro Kindeni muɲga iveta ɲinde nde kelekele ara nâ. Kinda ma tamora ɲinde tu kelekele sakamao ndimo. Kinda takura tu kawânda ndaɲge pa Maro Kindeni, ku takai taka, ⁵ɲana tu Maro Kindeni kawa ɲgua tava nenda noja iveta kelekele rârâni wa kâpwa rârâni wa ipâɲga zuzuli lâ i nao.

Paulo itu ɲgua pa Timoti tu i ma imo itogo Yesu

Kirisi ne wurâta tamâta ara mine

⁶Timoti, ambo noko ma kutula ɲgua ɲinde pwataki panzi kalo-tawana tamâta, ande noko ma kumo Yesu Kirisi ne wurâta tamâta ara. Kupakatona tamwata ne ilo-kalo sondo, aku kupono muli pa Maro Kindeni ne ɲgua mao tava ne ɲgua ɲinde muɲga sipananano kala uru pwoka muli ɲinde. ⁷Noko ma kupu muli papa usi tapârija kaa nâ tamâta pinde uru sitapâri ɲinde, aku kupanâna sondo ɲana kuveta vetâɲa ara nâ lâ Maro Kindeni nao. ⁸Ambo kinda ilonda tu taveta karaenda ipâɲga kaika, aku tapatogo tininda ikura zo rârâni, ande ɲinde ma ivila kinda ɲalae koja tia. Andeta kulojo ɲga; ambo kinda ma taveta vetâɲa ara lâ Maro Kindeni nao ikura zo rârâni, ande ɲinde ma ivila kinda ɲalae tina.

Vetâŋa ŋinde ikura tu ivila kinda ŋana tamo ara lâ zo ŋine tamo tâno kulu wa lâ zo muli tona.

⁹Ŋgua ŋinde nde mao kanaŋo, aku ara ŋana tamâta rârâni ma siloŋo ku kalonzi tawana. ¹⁰Nanayoni kinda tao nenda kalo-tawana ilâ sondo ndo pa Maro Kindeni, ina Via Tamwata. I ilo tu iyautenzi tamâta rârâni piti lâ kondoma ilo, aku ina uru iveta mine nâ pa kinda tamâta ŋine kalonda tawana i mao. Kinda nenda kalo-tawana keno mine, aku ŋana ŋinde kâ kinda uru tao tininda papa i ku tamakâsa ŋana taveta nenda wurâta ŋine sondo.

¹¹Noko ma kutula ŋgua ŋinde pwataki panzi kalo-tawana tamâta, aku kupanananzi tu ma soka muli. ¹²Kinzi uru simora noko tu tamâta lâlu, andeta naŋa tiningu pwâka tu kinzi ma ilonzi tu noko nde tamâta kaa nâ. Noko ma kuveta mâsi ara nâ, aku kutula nzâla sondo panzi kalo-tawana tamâta. Kutula nzâla panzi ŋana siporo ŋgua ara kâ, aku kutula nzâla panzi ŋana siveta vetâŋa ara nâ tona. Kutula nzâla panzi ŋana tininzi mwasa ndo panzi tininzi pinde kâ, aku kutula nzâla panzi ŋana kalonzi tawana Maro Kindeni kâ tona. Aku kutula nzâla panzi ŋana sipile vetâŋa potomule ndoni kâ. ¹³Noko ma pwai wurâta sondo ŋana kupono Maro Kindeni ne ŋgua ŋinde ikeno lâ pepa tini panzi tamâta, aku kutula ŋgua ŋinde duvi pwataki panzi wa kupanananzi sondo wa. Kuveta mine lee, ikura lâ zo ndia naŋa ma amâ apâŋga amo kuno. ¹⁴Noko ma kumbariri ŋana kuveta wurâta ŋinde kâ ndimo, ŋana tu Maro Kindeni muŋga walo ilano, itogo wisi-ara ŋana noko ne wurâta ŋinde kâ. Iveta mine lâ zo ŋinde ŋgu nenzi katonâŋa situla Maro Kindeni kawa ŋgua pwataki ŋana noko kâ, ku sio mbaunzi kâki noko kulu situ nzâmbe pano.

¹⁵Ikura zo rârâni, noko ma pwatona ne wurâta ŋinde sondo. Ambo noko ma kuveta wurâta ŋinde kaika, ande tamâta rârâni ma sisama tu muŋga noko kumo wurâta tamâta ara mwasa, aŋga ŋine kupâŋga wurâta tamâta ara ndo. ¹⁶Kupakatona sondo ŋana noko tamwata ne vetâŋa wa ŋgua ndia kupanananzi tamâta wa. Ambo noko ma kumandi kaika ndo ŋana kuveta mine, ande noko ma kupavila tamwata, ku ma kuvilanzi tamâta ŋinde uru siloŋo noko ne ŋgua mine nâ.

**Paulo itu ŋgua pa Timoti tu ma iveta vetâŋa kie taituni
panzi tamâta itogo uru iveta panzi i see mine**

5 ¹Noko ma kumbitanzi tamâne kokoŋa ndimo. Ambo kinzi ma siveta vetâŋa soki toŋge, ande kuvetanzi sondo ku kuporo ŋgua mwasa nâ panzi, itogo uru kuveta pa noko tama mine. Aku noko ma kuveta vetâŋa kie taituni panzi tamâne limoa, itogo uru kuveta panzi noko tamwata tai-tua mine. ²Aku noko ma kuveta vetâŋa kie taituni panzi taine kokoŋa itogo uru kuveta pa noko tina mine. Aku kuveta vetâŋa kie taituni panzi taine taipa, itogo uru kuveta panzi noko mwane mine. Noko ma kuveta vetâŋa potomule panzi taine taipa ndimo.

Ea ma ikatonanzi taine mwala mwala

³Ambo taine mwala tonje simbo nâ imo, ande ara, kupanananzi ngu nana sivila i ku siveta vetâna rârâni sondo nâ papa. ⁴Andeta kuloŋo nga; ambo taine mwala tonje natu-timbu simo, ande ara nana kinzi ninde ma sipanâna sondo nana nîne kâ: nenzi wurâta njae lâ Maro Kindeni nao nde nana sikatona warakanzi seenzi sondo muŋga lâ nga. Lâ nenzi vetâna ninde, ande kinzi ma sikatu tinanzi tamanzi wa timbunzi nenzi wurâta kulu panzi, nana tu muŋga kokoŋa ninde sikatona kinzi mine. Aku nenzi vetâna ninde ma itula pwataki tu nenzi kalo-tawana nde mao. Maro Kindeni ilo ara ndo nana vetâna mine kâ. ⁵Ambo taine mwala tonje simbo nâ imo, ande ara nana ma sikatona taine ninde sondo, nana tu i kalo tawana Maro Kindeni, aku uru io tini nana Maro Kindeni tu ma ike nana i kâ. Aku ikura zo rârâni, lâ kari wa mbo wa, i uru ino pa Maro Kindeni nana isuka i kâ. ⁶Andeta kuloŋo nga; ambo taine mwala tonje ilo njae nana tâno nîne ne vetâna kâ, kala itambira ne mbaliŋa ku indeka potomule, ande ninde itogo i ne kalo-tawana imâte lâ. ⁷Aku noko ma kupanananzi ngu tona nana sipaveta kuku nanengu ngua nîne, nana ma simo sondo nâ. Ambo kinzi ma simo sondo mine, ande tamâta tonje ma ikura nana iporo ngua soki njananzi, ande tia. ⁸Noko kalo ngere sondo nga; ambo tamâta tonje ikatonanzi i tamwata see wa i see katiŋe wa sondo tia, ande ne mâsi ninde itula i kilala pwataki tu i ipu muli pa ne kalo-tawana marumbu lâ. Opopo, kinzi tinikoa nandai uru siveta vetâna soki mine pa seenzi nga!

⁹Noko ma kuŋgere taine mwala mwala rârâni njanzi lâ pepa tini nana ngu ma sikatonanzi kâ, mine ndimo. Kuŋgere taine mwala nîne nâ nâ lâ pepa tini: ipole mbwera tamâta nato (60) lâ; i muŋga imo kuku kaiwa tamâne simbo nâ; ¹⁰i muŋga ikatonanzi natu sondo; i uru isuanzi tamâta lombo soka lawea pinde simâ; i uru ikai kuleŋa panzi kalo-tawana tamâta nana ipua kenzi kâ; i uru ivilanzi tini pinde nana nenzi malia kâ; aku i uru ilo ndo nana iveta vetâna ara pinde tona. Ambo tamâta uru situla taine koŋa tonje parina tu i nde taine nana iveta vetâna ara mine kâ, ande ara, noko ma kuŋgere taine ninde nâ lâ pepa tini nana ngu ma sikatona kâ.

¹¹Andeta noko ma kuŋgere kinzi taine taipa simo mwala ninde njanzi lâ pepa ninde tini ndimo. Nana tu muli kinzi ma ilonzi kâki nana sikâe kilo, aku ma sipu mulinzi pa Yesu Kirisi. ¹²Mine nde muli Maro Kindeni ma ipare nia panzi, nana tu sitoto nenzi ngua pânja utu lâ.^a ¹³Andeta

^a 5:12 Nenzi mâsi nde mine; lâ zo ndia taine mwala tonje isâu panzi katonânja tu ma siŋgere i nâ lâ pepa tini nana ngu ma sikatona, ande taine ninde ipa ngua kaika tu ma ikâe kilo tia.

ɲinde nâ tia; kinzi taine taipa simo mwala ɲinde uru sikai wulitia tona, aku soka potomule silâ pa luma pinde. Andeta kinzi uru sikai wulitia nâ tia; kinzi ilonzi koɲa ɲana situ tamâta ɲguananzi tona, aku sipete silâ wa simâ wa, siporo ɲgua nao-muli wa ɲgua ara tia wa. ¹⁴Mine kala naɲa ilonɲu tu taine taipa simo mwala ɲinde ma sipakâe kilo, aku ma sikainzi nenzi vâsa ku sikatona warakanzi nenzi luma. Ambo siveta mine, ande ara, kazâɲa tamâta tonɲe ma ikura ɲana imora nenzi vetâɲa soki tonɲe ku iporo ɲgua potomule ɲana kinda kalo-tawana tamâta kâ, ande ma tia. ¹⁵Noko kusama tu taine taipa pinde kaiwanzi simâte lâ, aku sipile nenzi kalo-tawana ku sipono muli pa Sadana.

¹⁶Ambo taine mwala tonɲe tina tâku tai tâku nitâpi tâ nde kalo-tawana taine, aku taine ɲinde uru imo kuku, ande ara ɲana kalo-tawana taine ɲinde ma ikatona taine mwala ɲinde. Ambo iveta mine, ande ma kalo-tawana tamâta ɲgu nenzi malia ɲana sikatona taine mwala ɲinde kâ, ande ma tia. ɲineɲga ɲgu ma ikura tu ikatonanzi taine mwala mwala ɲinde simo simbonzi nâ.

Kinda ma kulu talanzi katonâɲa ea uru siveta wurâta ara

¹⁷Ara ɲana kalo-tawana tamâta ɲgu ma kulu ara silanzi katonâɲa ea uru siveta nenzi wurâta ara nâ. Aku ara ɲana kulu ɲinde ma kâki panzi katonâɲa ɲinde uru situla Maro Kindeni ne ɲgua ku sipanananzi tamâta ɲana Maro Kindeni ne ilo-kalo. ¹⁸ɲana tu Maro Kindeni kawa ɲgua ikeno lâ pepa tini mine tu, “Miki ma kapono bulmakao kawa lâ zo ɲana ikai wurâta ɲana ipopo kaniɲa karae piti, mine ndimo”.^b Aku ɲgua pinde kala keno mine tu, “Wurâta tamâta ma ikai ne kulu”. ¹⁹Ambo tamâta taitu nâ iporo ɲgua tu, “Katonâɲa ɲinde nde iveta vetâɲa soki”, ande noko ma kalo tawana i ne ɲgua ndimo. Taitu kuloɲo ɲga; ambo tamâta rua wa ɲato siporo ɲgua mine, ande ara, kuloɲo nenzi ɲgua sondo. ²⁰Ambo katonâɲa tonɲe iveta kiesaka, ande ara ɲana noko ma kulelea i ku kuveta ne ɲgua sondo lâ kalo-tawana tamâta ndoni naonzi, ɲana kinzi pinde ma siruru ɲana siveta kiesaka mine kâ.

Paulo itu ɲgua pa Timoti tu ma ipakatona sondo ɲana i tamwata ne vetâɲa kâ

²¹Lâ Maro Kindeni nao, aɲga lâ Yesu Kirisi nao, aɲga lâ kinzi aɲelo naonzi, naɲa aporo ɲgua kaika pano mine tu noko ma kupaveta kuku ɲgua tukuɲa ɲine. Noko ma kuveta vetâɲa kie taituni panzi tamâta râràni. Noko ma kuveta vetâɲa tonɲe panzi tamâta ɲalaɲala wa ninambwe wa, aɲga kuveta vetâɲa tonɲe panzi tamâta pinde, mine ndimo.

^b 5:18 Lâ zo ɲana bulmakao siveta wurâta ɲinde, ande nenzi katonâɲa tamâta sisâu panzi tu sika kaniɲa pinde. Tia ma putole ipunzi, ku ma siveta wurâta ara tia.

²²Aku noko ma walele nâ kuo mbau lâ tamâta kulunzi ñana itula pwataki tu Maro Kindeni ipateanzi ñana siveta wurâta papa i kâ, mine ndimo. Ambo noko kutu nzâmbé pa tamâta tonje, andeta muli iveta kiesaka, ande ne kiesaka ñinde ma imâ iloko lâ noko tini, aku ñinde ma ara tia ndo. Kupakatona tamwata sondo, ñana ma kumo mbâra-mbâra lâ Maro Kindeni nao.

²³Naña ilongu tu noko ma kupile ne vetâña ñana kunu lââ kaa nâ. Ara ñana noko ma kunu lââ waini nuña mwata tona, ñana tu ñinde ma isukano ñana pukonja kie-kie ñinde uru ikeno pano ku iyaula noko kapwa.

²⁴Tamâta pinde nenzi kiesaka nde ikeno nia yo, aku nenzi kiesaka ñinde nde ilâ pa Maro Kindeni ne ñgua nia imunga panzi. Anja tamâta pinde nenzi kiesaka nde ikeno paveâña nâ, andeta muli ñga nenzi kiesaka ñinde ma ipânga nia yo. ²⁵Aku mine nâ, tamâta nenzi vetâña ara uru ipânga nia yo. Ambo tamâta pinde nenzi vetâña ara ipânga nia yo walele tia, ande vetâña ara ñinde ma ikura tu ipavea zo rârâni kâ, ande tia.

**Paulo ñgere ñgua panzi tamâta uru siveta wurâta
koa tia nâ panzi tamâta ñalajala**

6 ¹Kalo-tawana tamâta pinde uru sikai wurâta koa tia nâ panzi tamâta ñalajala. Aku naña aporo ñgua ilâ pa kinzi ñinde mine tu ara ñana ma simege ñana nenzi koipu ku simo kalonzi. Ambo siveta mine, ande nenzi koipu ma sikura tu siporo ñgua potomule ñana Maro Kindeni wa nenda kalo-tawana wa, ande ma tia. ²Ambo wurâta tamâta kaa nâ tonje ne tamâta ñalae nde kalo-tawana tamâta, ande wurâta tamâta ñinde ma ilo mine tu, “Ñine nde niñgu-nambwe nâ; mine nde kalo loko, naña ma avaligi i ne ñgua”, mine ndimo. Ara ñana i ma ilo keno mine, “Tamâta ñine kala aveta wurâta papa ñana asuka i kâ, i nde niñgu-nambwe kalo-tawana tamâta; mine kala naña ma tiniñgu mwasa ndo papa i”. Ambo wurâta tamâta ilo keno mine, ande i ma iveta wurâta ara ndo papa. Noko ma kupanananzi ku kuporo ñgua kaika panzi mine.

**Vetâña ñana ilonda ñalae pa mbaliña kâ,
ande vetâña sakamao rârâni duvi**

³Nenda Maro ñalae Yesu Kirisi ne ñgua mao nde uru ipanana kinda rârâni sondo ñana Maro Kindeni ne ilo-kalo kâ. Ambo tamâta tonje ipile ñgua ñinde, aku ipanananzi tamâta ñana ñgua lañeña pinde, ⁴ande tamâta ñinde ipasuka tamwata tini nâ. I taña kaika nâ, aku isama sâ tonje tia. I ilo ñalae konja ñana ipawa ñgua kunzi tamâta kâ. Aku vetâña ñinde uru iyaulanzi tamâta ilonzi kalonzi, kala sipadâda wa sipara wa situ tamâta ñguananzi wa ilonzi sakamao ñananzi tamâta pinde wa ⁵sipawa ñgua ñalae wa. Kinzi tamâta ñinde nde kapa ndo, aku sisama

ngua mao tonje tia ndo. Kinzi ilonzi tu nenzi kalo-tawana ma isukanzi tu sipânnga simo mbaliņa warakanzi. ⁶Andeta tia. Mao nâ, ambo kinda tapaveta kuku vetâņa ndia Maro Kindeni ilo papa nņinde, ande kinda ma ilonda yosi nņa mbaliņa kâ, ande tia. Ambo kinda tamo mine, ande nņinde itogo kinda tamo mbaliņa warakânda mine.

⁷Kinda tasama tu lâ zo nņa tinânda sipagugua kinda tapânnga tâno kulu, ande kinda tapânnga tava tininda kaa nâ. Aku lâ zo nņa tamâte, ande kinda ma takai kelekele tonje iyoka ku kinda, ande tia. ⁸Mine kala, ambo kâpwa nņa lalava ikeno pa kinda, ande ara, kinda ma tandeka ku taporo tu, “Ŋine nde ikurana”. ⁹Aņa tamâta ea ilonzi tu sigona mbaliņa rârâ, ande samâņa uru ipânnga panzi ku ikainzi kaika, itogo nimbu ikai nņgoa mine. Aku ilonzi igagatinzi nņa siveta vetâņa soki rârâ. Aku nņinde iveta ilonzi kalonzi ipânnga kapa ndo, kala sipayaula warakanzi ku simo sakamao ndo. ¹⁰Ŋana tu vetâņa nņa ilonda nņalae pa mbaliņa kâ, ande nņinde nde vetâņa sakamao rârâni duvi. Muņa tamâta pinde ilonzi nņalae ndo pa mbaliņa kâ, aku ilo-kalo nņinde izavarunzi ndo lâ. Mine kala sipile nenzi kalo tawana, aku sisânda malia nņalae tina kulu.

Ara nņa kinda ma tamandi kaika ku takai via mao

¹¹Aņa noko nde Maro Kindeni ne wurâta tamâta. Mine kala ara nņa noko ma kupu muli pa vetâņa sakamao kie-kie nņinde, aku tini piti ndo nņa. Kumandi kaika ku kuveta vetâņa rârâni Maro Kindeni ilo tu ma taveta. Noko ma kuveta vetâņa arara nâ, ikura kinzi kalo-tawana tamâta mao uru siveta mine. Kuo ne kalo-tawana ilâ sondo ndo pa Yesu Kirisi, aku tini mwasa nâ panzi tini pinde. Noko ma pwai wulitia nņa ne wurâta kâ ndimo. Noko ma nao mwasa nâ panzi tamâta. ¹²Kinzi tamâta nņa sipalilu sipopole kâ nde uru sipalilu kaika nâ. Aku mine nâ, ara nņa noko ma kupalilu kaika nņa pwai ne via mao nņa ma kumo ara mine ku kumo nâ. Muņani, lâ zo nņinde noko kumandi ku kutula ne kalo-tawana pwataki lâ tamâta rârâ naonzi, ande lâ zoni ndaina Maro Kindeni isarâwa pano tu pwai via nņinde. ¹³Naņa aporo nņgua kaika pano lâ Maro Kindeni Via Warika nao, aņa lâ Yesu Kirisi nao, ina muņa imandi kaika lâ Pontius Pilata nao ku itula ne kalo-tawana pwataki. Nanenggu nņgua nde mine; ¹⁴Noko ma pwoka tukuņa nņine muli. Ambo noko ma kumo sondo mine, ne soki tonje tia, ande tamâta tonje ma ikura nņa iporo nņgua sakamao tonje nņanano, ande tia. Noko ma kumo mine lee, ikura lâ zo muli nņinde nenda Maro Ŋalae Yesu Kirisi ma itaulo imâ kilo. ¹⁵Yesu Kirisi ma ipânnga lâ zo tonje nia ndoyo Maro Kindeni ipatea papa keno lâ. Kinda nenda paneņa wa ndekâņa wa ilâ pa Maro Kindeni. I simbo nâ ikai Maro panzi tamâta rârâni lâ tâno ndoni. Imo Koipu Ŋalae panzi koipu nņalanala rârâni, aku imo Maro Ŋalae panzi maro rârâni. ¹⁶Maro Kindeni simbo nâ ikura nņa imâte tia. I imo sinâla nņalae ilo, aku tamâta

tonje ikura ŋana ilâ i tini laiti kâ, ande tia. Tamâta tonje muŋga imora i nao, ande tia, aku tamâta tonje ikura ŋana imora i nao kâ, ande tia. Ikura zo zo, nenda paneâŋa ilâ papa i simbo nâ. I nde Walo Tamwata, uru imo mine ku imo nâ. Mao.

**Paulo ipainzi mbaliŋa warakanzi tu ma kalonzi
tawana Maro Kindeni ku sivilanzi tininzi pinde**

¹⁷Noko ma kuporo ŋgua kaika panzi tamâta simo mbaliŋa warakanzi lâ tâno ŋine kulu tu kinzi ma sipasuka warakanzi ŋanzi kâki ndimo. Aku kupainzi tu ma sio nenzi kalo-tawana ilâ pa kelekele uru nao tia walele nâ, mine ndimo. Kuporo ŋgua kaika panzi tu ma kalonzi tawana Maro Kindeni mao nâ, ŋana tu i uru kelekele arara kie-kie ilua kinda ŋana takai ku tandeka kâ. ¹⁸Noko ma kupainzi tu ma siveta vetâŋa arara kie-kie ŋana sivilanzi tininzi pinde kâ. Nenzi vetâŋa ara ŋinde nâ nde itogo nenzi mbaliŋa mao. Ara ŋana kinzi ma sindeka ŋana kelekele rârâ silanzi sugorai tamwatanzi. ¹⁹Ambo kinzi ma siveta vetâŋa mine, ande ŋinde itogo sigona mbaliŋa rârâ ŋana isuka warakanzi lâ zo muli. Mine kala kinzi ma sikura tu sisaŋa via mao kaika.

Paulo itu ŋgua kulu pa Timoti tu ma ikatona ne wurâta sondo

²⁰Timoti, Maro Kindeni muŋga ipatea wurâta ŋinde pano. Mine nde ara ŋana noko ma pwatona wurâta ŋinde sondo. Ambo ŋgua tonje iyoke Maro Kindeni kawa ŋgua tia, ande kupu muli pa ŋgua laŋeŋa potomule ŋinde. Ambo tamâta kapa pinde ma situla ŋgua laŋeŋa ku siporo tu, “Ŋine nde ilo-kalo ara”, ande noko ma kupu muli papa ŋgua ŋinde tona. ²¹Muŋga tamâta pinde kalonzi tawana Yesu Kirisi, andeta muli, ŋineŋga sipile nenzi kalo-tawana ku sipono muli pa ilo-kalo soki ŋinde.

Maro Kindeni ne wisi-wisi imo kumi.